

BuddyLove ta cuminsa un era musical nobo cu Icons di Corsou

Jair Buddy Vesprey, miho conoci como 'BuddyLove' kende ta un persona masha conoci mes den mundo musical pa su canticanan, ayera riba su rednan social a anuncia publicamente cu e ta bay retira di e agrupacion musical Buleria.

Cu un mensahe hopi emotivo, BuddyLove a expresa lo siguiente: "Feliz dia. Mi tin un mensahe importante pa comparti cu boso: Cu un mezcla di tristesa y gratitud, ami, BuddyLove, kier anuncia mi decision pa laga e grupo musical Buleria Oficial.

Despues di seis (6) aña formando parti di e famia musical aki, creando cancionnan inolvidabel y memorianan inigualabel, mi ta cla pa cera e capitulo importante aki den mi bida, cu bista riba mi desaroyo personal y profesional. Mi temporada den Buleria tabata yena di experiencia y momentonan inolvidabel y

mi ta masha agradecido pa e momentonan bunita, amistad y support cu mi a ricibi durante tur e añanan.

Mi temporada den e famia aki lo keda pa semper un capitulo importante den mi bida, y ta desea Buleria e miho den futuro. Mi decision no tabata facil, pero mi ta sinti cu e ta e paso corecto pa tuma na e momento crucial aki di mi bida. Mi no tin ningun duda cu bo(so) (amigonan, famia y fanaticonan) lo sigui hunto cu mi den cualkier paso cu mi tuma y mi ta spera cu bo(so) compronde y sostene mi decision.

Esaki ta djis e comienso di un era nobo di BuddyLove. Yegando na e parti final, mi kier expresa mi gratitud na tur esnan cu di un forma of otro a forma parti di mi aventura musical hunto cu team di Buleria y na tur mi fanaticonan, keda pendiente pa proyecto nan nobo. Mil y un danki di curason pa bo comprension y bo sosten di semper."



Aunke BuddyLove no a duna mucho detaye di kico ta trata

e comienso nobo aki, BuddyLove recientemente tabata compartiendo escenario cu

e banda musical di Corsou "ICONS" na unda ayera mes despues di e post di BuddyLove nan a yama "bonbini na e miembro di mas nobo."

Den un post riba su rednan social ICONS Curacao a publica un potret di BuddyLove cu lo siguiente: "Cu yegada di Buddylove den ICONS, nos team ta wordo fortifica cu un artista jong, moderno, y versatil cu por canta di balada, te soca, y di tumba te ritmo combina, genero musical Latino y mas aya! Buddylove su prome presentacion den ICONS lo ta den Umbrella dia 28 di september na Landhuis Chobolobo."

Por a recorda cu for di mei ya caba tabatin rumornan tocante e salida di BuddyLove for di Buleria e cual a ser desmentida pa Buleria mes mediante un post.

Redaccion di Bon Dia Aruba ta desea na BuddyLove hopi exito den su trayectoria musical nobo.

Hof y Ministerio Publico a firma convenio di reglamento di proceso penal nobo



Diaranson 21 di augustus y diabierna 23 di augustus 2024, e Fiscal General di Aruba y Fiscal General di Corsou, Sint Maarten, y di Boneiro, Sint Eustatius y Saba, hunto cu presidente di Corte Comun di Husticia a firma e Convenio y Reglamento di Proceso Penal.

Cu e firma di e acuerdo aki, pa prome biaha Hof ta haci acuerdo di trabou cu e dos Ministerionan Publico, pues e biaha aki si ta inclui Ministerio Publico di Aruba. E ultimo acuerdo tabata firma solamente cu e Ministerio Publico di Corsou, di Sint Maarten y di Boneiro, Sint

Eustatius y Saba.

E convenio aki ta establece acuerdonan riba un metodo uniforme pa e tratamento di casonan penal y capacidad di audiencia den cada sede di Hof. Den e reglamento di proceso penal, cual tambe a wordo firma pa partinan, ta elabora detayadamente to-

cante e acuerdonan di trabou. E convenio y e reglamento di proceso penal lo drenta den vigor dia 1 di september.

Mediante un comunicado, Corte Comun di Husticia ta splica cu e convenio ta enfoca specialmente riba acuerdonan tocante e provision di audiencianan na tur sede di e Hof y lo ser firma cada aña.

E firma di e convenio aki ta marca otro logro importante, no solamente pasobra e ultimo convenio ta di algun aña pasa, si no tambe pasobra e acuerdo nobo aki pa prome biaha ta wordo compaña pa un reglamento di proceso penal. Cu e introduccion di e reglamento di proceso penal, e reglamentonan di proceso cu ya ta existi pa casonan civil y derecho administrativo, ta wordo completa.

Hof ta remarca cu e reglamento di proceso penal tin como obhetivo trece uniformidad den e manera di trata casonan penal pa Husticia, Hof y Ministerio Publico, tanto den prome instancia como den apelacion. Unda cu tin mester, e reglamento ta duna espacio pa atencion specifico pa haci husticia den

siituacionnan local.

E reglamento ta enfoca tambe riba mehoracion di varios proceso, manera entre otro planificacion y designacion, compilacion di dossiernan y e proceso administrativo despues cu un decision wordo tuma. Un meta importante di e reglamento ta pa contribui na e reduccion di tempo pa proceso di casonan penal.

Por ultimo, Hof ta indica, e reglamento ta proporciona un procedura pa desaroyo y mehoracion, y lo wordo ahusta pronto na e Codigo di Procedura Penal nobo cu ya caba a drenta na vigor na Aruba.

